

Date – 18/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Vantlang phur leh ei leh in phur lirthei pawl hrang hrang 12 intelkhawmna Mizoram Commercial Vehicle Union chuan tuialhthei man sang avangin an hna an thawh theih loh thu sorkar ah an thlen.
2. Mizoram Legislative Forum on HIV/AIDS thutkhawm nimin khan Health Minister Pi Lalrinpuii hova neih a ni.
3. Prime Minister Narendra Modia chuan tunthla ni 21 atanga ni 23 chhung hian US ah Quad Leader Summit a hmang dawn.
4. Myanmar-a tuilian tuarte chhawmdawl nan sawrkar laipui chuan Operation Sadbhav hnuaiyah chhawmdawl na bungrua tonne 83-a rit a thawh tawh.



COMMERCIAL VEHICLE UNION

Vantlang phur leh ei leh in phur lirthei pawl hrang hrang 12 intelkhawmna Mizoram Commercial Vehicle Union chuan tuialhthei man sang avangin an hna an thawh theih loh thu Taxation Minister Dr Vanlalhlana hnenah nimin khan an thlen a,

Mizoram Commercial Vehicle Union hruaitute hnen atanga kan corr thudawn danin Mizorama tuialhthei man sang avang hian nawrh an tum ni lovin an tan hlawkna a awm tak loh avangin din rih mai an ngai dawn a ni an ti a ni.

Tuialhthei man sang avang hian an rate an san a ngai dawn a, ran an pun chuan mipuiin an tuar dawn si a, hei hi an ngaingamlo tih an sawi a, Truck hian Bairabi railhead atanga Lawngtlai thlen nan disel lit 450 vel a mamawh a, chutah cheng 8 dawna oil man a pun chuan hlawh an nei dawn lova, an tlan thei tawh dawn lo an ti a ni.

Puan tawh angin, Mizoram sawrkar chuan Sept thla atanga hman tan turin petrol leh Diesel-a chhiah a lak thin a ti pung a.

Taxation Department chuan thuchhuah siamin Mizoram sorkar chuan petrol leh diesel-a value added tax (VAT) a lak thin a tisang tih a tarlang a, Social Infrastructure & Services Cess leh Road Maintenance Cess a la dawn tih a tarlang bawk.

August 30-a thuchhuah a siamah diesel-a chhiah zaa 5.23 lak thin chu zaa 10-ah tihsan a n tih leh petrol-a chhiah zaa 16.36 a lak thin chu zaa 18-ah tihsan a ni tih tarlan a ni a, perol leh diesel-ah hian Social Infrastructure & Services Cess cheng 2 leh Road Manintenance Cess cheng 2 lak a ni dawn tih tarlan a ni.



NH 54 ROAD

Mizoram Oil Tanker Driver Association (MOTDA) leh Petroleum Entrepreneurs' Transport Union of Mizoram (PETUM) te chuan Kawngpui chhia avanga lirtheite tana chetsual hlauhawm an tih avangin nimin atang khan pawl pahnih hnuai lirtheite an tlan lo.

MOTDA leh PETUM hruaitute chuan kar kalta inrinni khan Aijal Club ah It meeting an nei a, hemi tuma an rel danin, Mizorama Kawngpui, a bikin Kawngpui leh Sairang inkar Kawngpui chu Tuialhthei phur lirtheite tan chetsual hlauhawm khawpin a chhe mek a. Kawng chhia a tlan hian Petrol leh Diesel baw palh in chhiatna nasa tak a thlen theih avangin vawiin atang khan Tuialhthei phur te chu tlan rihloh nise, an tih angin Mizoram a lo lut tur lirtheite pawh tlan lui lo turin an ngen a, hei hian lirthei dangte a huam loh thu an sawi.

Nimin khan PWD Minister Pu Vanlalhlana pisaah Mizoram Truck Owners Association (MTOA) leh Mizoram Truck Drivers Association (MTDA) hruaitute an inkawm a. Deputy Speaker leh Kolasib bialtu ni bawk Pu Lalfamkima chuan a telpui a ni.

He hunah hian MTOA leh MTDA ten Kawngpui-Khamrang kawng chhia avanga harsatna an tawh te sawiin, tun aia chak zawka kawng siam a nih theih dan te an sawi a. A bul tan nan vawiin hian Minister hovin MTOA leh MTDA hruaitute nen a hmun ngeia enfiah an rel nghal a ni.

Hetihlai hian, Kolasib CMO hmalaknain Kawngpui leh Sairang inkar- Tuitun leh Khamrang khaw inkara Kawng chhia avanga lirthei tangkhang mek khalhtu te zun leh ek thiarna hmun leh an hriselna dinhmun endik sak anni.

Lirthei khalhtute hriselna dinhmun an endikna ah hian damlo enkawl ngai leh damdawi pek ngai hmuh a ni lova, Malaria laka an him nan thosilen a thlawnin pek anni. Medical staff te hian Driver te inthiar dan te zawt fiah in, natna inkai darhna kawngah harsatna a thlen loh nan, lei lai khuar ah inthiar in, lei in vur leh zel tura hriattir anni a. Medical staff te hian hriselna kawngah zirtirna an pe nghal bawk.

Driver tangkhangte dinhmun enfiahna ah hian Kolasib CMO office atangin Health Supervisor pahnih leh Health Worker pathum an kal a ni.

Supply Department chuan Mizoram chak lakna kawngpui chhia avanga mipui mamawh hrang hrang phurhluh khaihlik deuh mahse mipuite chia lo turin an ngen a ni.

Food, Civil Supplies & Consumer Affairs department Director chuan nimin khan thuchhuah siamin, rokhawlhna avanga Oil phurh luh a khaihlik chhungin mipuite chia lo turin a ngen a, PWD ten theihtawp chhuahin kawng siam that hna an thawh mek thu leh siam that thuai beisei a nih thu a sawi a, Petrol Pump ten Oil pek chhuah dan tur thupek awm sa an zawm that zel a tul thu leh lirthei a thun bak chu bur hmanga pe chhuak lo turin a ngen nawn a, mipuite pawhin harsatna hrethiam a, mahni lirthei a thun theih bak la khawm lo turin a ngen bawk a ni.



TAXATION DEPT

Taxation Department chu Mizoram Sawrkar hnuaiia Department atanga paih a, Taxation hi Department hrang anga awm tawhlo in Finance Department hnuaiia a awm tawh dawn a ni.

Hemi chungchanga Governor thuchhuah tarlan danin Taxation Department a hranga awm thin chu paih a ni a, a changtu Minister Dr Vanlalhlana enkawl Dept atang pawhin paih a ni.

Taxation Department paih chungchangah hian Chief Minister Pu Lalduhoma chuan Assembly thutkhawm hnukung berah khan Taxation Department chu tuna a awmdan ang tho in tih danglam loh in Finance Department hnuaiia a awm tawh dawn a ti a, a pisa leh thawktute pawh sawi danglam an ni lo ang a ti.

Chief Minister chuan 16th Finance Commission atana inbuatsaihnaah Finance Department in Cell dina hmalak an tumna ah Taxation Department a tel theih loh avangin sum lakluhna tura ruahmanna siam turah department hrang anga thawh tawn chu hun sen ral na mai anih bakah harsatna neuh neuh a awm thin a ti a, department khat hnuaiia an awm chuan awlsam zawk leh chak zawka hnathawh ani thei dawn tih a sawi a ni.



HEALTH MINISTER MEETING

Mizoram Legislative Forum on HIV/AIDS chu Health Minister Pi Lalrinpuii an Chairman ni bawk kaihhruaina-in SAD Conference Hall, MINECO-ah thutkhawm a ni.

Pi Lalrinpuii chuan tun Sawrkar tharah Legislative forum on HIV /Aids thutkhawm vawikhatna a nih thu a sawi a, he natna hi mi awmtha duh lo leh ruihhlo ngaite chauh kai theih tura ngaih anih laiin tunah chuan he natna hi rin loh pui pui te'n an kai tawh a, fimkhur tlan a pawimawh takzet thu a sawi.

Meeting-ah hian Mizoram HIV dinhmun sawihona neih niin HIV Estimation 2023-in a tarlan angin, Mizoram Adult HIV Prevalence chu zaa 2.73 a nih laiin National Adult HIV Prevalence chu zaa 0.2 a ni thung a. Kum 1990 atanga August 2024 thleng khan Mizoram-ah HIV kai mi 31461 hmuhchhuah tawh niin heng zinga mi 2541 te chu nu naupaite atanga hmuhchhuah an ni.

HIV inkaichhawn tamna ber chu invenna tel lova mipat hmeichhiatna hman niin HIV kai hmuhchhuah zawng zawng atanga zaa 63.93 an tling a. Inchiu-na hmanrua inhman tawm atanga HIV kai hi zaa 30.80 zet an ni bawk. Tun dinhmunah HIV kai enkawlina (ART) la mek mi 16661 an awm a. HIV kai boral hi mi 5277 an tawh thu Meeting-ah hian tarlan a ni.

He thutkhawmah hian District Hospital-a HIV/AIDS leh a kaihhnawih enkawlina pual bik hmuhma sawiho niin tun dinhmunah a thlawna HIV test-na hmun (ICTC) 39 a awm mek a. HIV kai te enkawlina hmun (ART Centre) hi hmun 14-ah a awm bawk a. ICTC leh ART Centre te hi District zawng zawngah dah vek a ni.

Meeting-ah hian HIV positive, ART damdawi ei lai ei chhonzawm lo, an mahni awmna chhui zui hleih theih loh an awm thin chu pawh an tih thu tarlan niin

an Aadhar nen a thlunzawm dan ngaihtuah nise tih a ni a. National AIDS Control Organisation (NACO) rawn chungin mi zawng zawng tan HIV test theihna tur MSACS hotute'n kawng lo dap se tih a ni bawk. He natna hi kan ram leh hnam hnukkhawih thei thil a nih avangin he natna veite hmusit leh endawng lova, nu naupai lain HIV test an tih ngei ngei a ngai ang hian Mandatory Test tih theih dan Policy duan emaw siam that emaw nise tih a ni bawk.

(DIPR)

<><><>

HNAHTHIAL

Hnahtthial District-ah ICDS leh UD&PA tangkawp buatsaihin Early Childhood Care and Education (ECCE) Festival leh Swach Bharat Cultural Fest nimin khan huaihawt a ni a. He hunah hian Bawrhsap Pi Rita Lalnunmawii Pachuau chuan a hmanpui.

He hunah hian ECCE leh Swach Bharat Cultural Fest puala thil siam chi hrang hrang pho chhuah a ni a. Poshan Maa leh Swach Bharat puala Selfie point te siam niin Waste to Art display te pho chhuah a ni bawk a. Hmanlai Mizo bungrua hrang hrang bakah Mizo naupang infiamna hmanrua chi hrang hrangte he hun chhim apiangte tana hmuh theih tura pho chhuah a ni bawk. He hun pual hian Chanmari YMA ten cheraw kain Anganwadi naupangte hnen atang zai mawi tak ngaihthlak a ni.

He hun hi Anganwadi centre 20 atanga worker te, 3-6 years pre school nu leh pa te bakah Mzsrml lam atanga thawktu ten an chhim a ni.

<><><>

INDIGO FLIGHT

Chief Minister Pu Lalduhoma kaihruaina hnuai GAD Civil Aviation Wing leh Ministry of Civil Aviation te hmalakna angin IndiGo Airline chuan Delhi - Aizawl inkara an thlawhna thlawk zat kar khata vawi 5 ni thin chu vawi 10 ah an tipung dawn.

Thla thar October ni 5 atanga kalpui tan tur a ni a. Delhi _ Aizawl thlawhna hi nitin a thlawk dawn a, Nilaini, Zirtawpni leh Pathianni ah chuan vawi 2 a thlawk dawn a ni.

(DIPR)

<><><>

PM IN US

Prime Minister Narendra Modia chuan tunthla ni 21 atanga ni 23 chhung hian US ah Quad Leader Summit a hmang dawn. Quad Leader Summit hi Delaware-a Wilmington ah tun thla ni 21 hian neih a ni dawn a ni. Kuminah hian a thlengtu US rawtna angin nakum Quad Summit 2025 chu India in a thleng ve thung dawn ani.

External Affairs Ministry sawidanin he summit ah hian kum khat kalta chhunga Quad ramte hmasawna hrang hrang thlirho a ni dawn a. Hun lo kal tura Indo-Pacific chhehvela hmasawna hna an chhawp hrang hrang tihhlawhtlin dan turte an sawiho ang.

Pu Modia hian US-a a cham chhung vek hian UN General Assembly-a 'Summit of the Future' inhmukhawmah thu a sawi dawn a. He summit ah hian

khawvel ram hruaitu thahnem tak an tel dawn a. He summit karlakaha hian ram hruaitu hrang hrangte a dawr dawn bawk a ni.

Pu Modia hian New York-a India mi chengte a kawm ang a. Heng bakah hian US-a inkulh company lian tak tak CEO te nen an inkawm dawn bawk a. He hunah hian AI,computer, semiconductor leh biotechnology lama thawhdunna hrang hrangte a sawipui dawn a ni.

(Newsonair)



FLOOD RELIEF

Myanmar-a tuilian tuarte chhawmdawl nan sawrkar laipui chuan Operation Sadbhav hnuaiyah chhawmdawlina bungrua tonne 83-a rit a thawn tawh. Typhoon Yagi tleh avangin mi za chuang an thi a, in leh lo tam tak a ti chhe bawk a. Hei vang hian India chuan chhawmdawlina hmasa ber atan tonne 21 a rit chhawmdawlina bungrua a thawnlut a. Hemi hnu hian tonne 32 a rit chhawmdawlina hmanraw chi hrang hrang a thawnlut leh bawk a. Indian Air Force thlawhna IL-76t hmangin nimin khan a thawh hnihna tur hi phurh leh a ni a. Bungraw thawnluh zingah hian chen lailawkna tur puaninte, thianghlimna lam kaihnaiwh bungrua, solar lamp leh a dangte a tel a ni.

Operation Sadbhav hi India in hun reitak a lo kalpui tawh Act East leh thenawm hnai ngaihpawimawh hmasak Neighbourhood First policy zulzuia tih a ni.

Hetihlai hian Central leh Eastern Europe-ah te tui a lian nasa hle a. Tuilian avanga chhiatna thlengah mi 18 an thi tawh a ni. Poland -ah tuilian avangin mi pali an thi a. Thla khat chung chu khuarel chhiatna thlengah puan a ni tawh a. Sipai 5000 chuang chhanchhuah hna thawk tura tirhluh an ni.

Romania ah pawh mi pasarih tuilian avangin an thi a. October ni 16 thleng state of emergency puan a ni.

Czech Republic ah pawh tuilian avangin mi pathum an thi a, mi 13,000 chuang hmun himah thiarchhuah an ni a. Hamrchhak hmun hnihah state of emergency puan a ni bawk.

Hei bakah hian Austria-ah tuilian avangin mi pali an thi a, chenna in sang chuangin kawlpheha leh tui an tlachham tawh a ni.

Slovakia leh Hungary ah River Danube chim chin a sang zel a, hlauhawm chhinchhiahna a pel tawh a ni.

(Newsonair)

